

Uttale til høyring på forskrift om jakt- og fangsttider 2022-2028. Innspel om utvida jakttid på hjort

Vaksdal kommune viser til Miljødirektoratet sitt brev av 20.05.21, om offentlig høyring på forskrift om jakt- og fangsttider 2022-2028.

I tråd med brev frå Vestland fylkeskommune av 18.06.21, sender vi uttalen vår til fylkeskommunen for samanstilling og vidaresending til Miljødirektoratet.

Med bakgrunn i vedtak i Formannskapet av 31. august 2021, går Vaksdal kommune inn for å utvide jakttida på hjort, med ny jaktidsramme frå og med 20. august til og med 23. desember, og frå og med 1. januar til og med 31. januar.

Framlegget er avgrensa til at det berre skal vere lov å jakta på innmark etter friluftsløva sin definisjon, i perioden frå og med 20. august til og med 31. august.

Kommunen sitt viktigaste argument for å framskande jakta, er omsynet til skade- problematikk på innmark, grunna store og veksande hjortebestandar. Denne situasjonen er utbreidd mange stader på Vestlandet, og til stor skade i viktige jordbruksområde.

Ei framskunding av ordinær jakttid til 20. august, vil leggje til rette for eit høgare uttak av skadegjerarar på innmark innanfor ordinær jakttid. Dette vil igjen kunne redusere søknadane om - og tildelingane av - «skadedyr» etter naturmangfaldlova, som i dag er ei reell problemstilling i høve til skadesituasjonen.

Bruk av skadefellingsordninga er omdiskutert, og som problemløysing vil det vil truleg vere like tenleg å utvide jaktidsramma, samanlikna med ein lokal prosess om tildeling av «skadedyr». Vi trur også at dette vil medverke til eit vel så presist og effektivt uttak som bruk av skadefellingsordninga.

Eit anna argument for å framskande jaktstarten, er å få tilstrekkeleg tid til å ta ut tildelte løyve og rett type dyr under ordinær jakt, spesielt i «høgareliggjande strøk», der trekkjande bestandar gjer at den relle tida for å ta ut tildelte løyve er avgrensa. Vi er kjend med at tidlegare opning for jaktidsstart frå 1. september, skulle medverke til dette, men går inn for ei ytterlegare framskunding.

Føresetnaden for å framskande jaktstart til 20. august, er ei biologisk og etisk forsvarleg jakt. Denne vurderinga vart vurdert - og funnet tilrådeleg - av Miljødirektoratet i samband med utviding av hjortejakta i randkommunane til Storfjella villreinområde (den sokalla «CWD-sona»). Jaktida her fell saman med vår føreslegne jakttid i begge endar, og bør i dette høve vere tilrådeleg.

Omsynet til friluftslivet, jf. viltlova § 1 andre ledd, må liggje til grunn ved fastsetjing av jakttider. Her meiner vi difor at ei opning for jaktstart frå og med 20. august, bør avgrensast til innmark, og at dette ikkje vil vere i særleg konflikt med andre friluftslivsinteresser. Den

same vurderinga er òg knytt til framlegget om å utvide jakta i januar månad.

Vaksdal kommune meiner at ei utviding av jakta til og med januar månad, kan leggje grunnlag for å høgare uttak, der den lokale situasjon tilseier dette.

Kommunen ser poenget i god organisering av forvaltning og jaktutøving gjennom bestandsplanområde og jaktsamarbeid, og reknar dette som eit grunnleggjande prinsipp. For Vaksdal sin del, er over 80 % av arealet organisert i bestandsplanområde, med ei årleg avskyting opp mot 90 % av tildelt kvote. Dette indikerer at jaktinnsatsen er relativt bra i høve til dei dyra som skal takast ut. Inntrykket er at situasjonen er slik i mange kommunar på Vestlandet. Men ei utvida jakttida vil kunne leggje forholda enda betre til rette for å nå bestandsmåla, utan at det går ut over kva som er biologisk/etisk forsvarleg eller friluftslivsinteressene. I dette høve viser vi til Miljødirektoratet sitt tidlegare brev til kommunane, om at tida for dei store hjorteviltbestandane er forbi. Her vil ei utvida jaktida kunne medverke til at både offentlege og privatsrettslege mål blir oppnådd på ein god måte, spesielt med bakgrunn i at talet på tildelte løyve i dei fleste kommunar, høgst truleg vil auke framover.